

*Regional News Unit AIR Aizawl  
Monday, November 04, 2024*

**Time - 7:30 -7:40Hrs**

## **REGIONAL NEWS BULLETIN**

### **HEADLINES (MORNING)**

- Naktuk, Thawhlejni zing dar 7 leh tlai dar 4 inkara Sinlung Hills Council inthlan vote thlak tur atana inbuatsaihna peihfel thawkhat a ni.
- Kumin thla 10 chung khan ruihhlo hmansual vangin Mizoramah mi 61 an thi tawh a, an zinga 8 chu hmeichhia an ni.
- Prime Minister Narendra Modia chuan tuberculosis TB vei zat an tlahniam zel chu India-in ngaihtuahna thar nen tihtakzeta a do vang a ni a ti.
- External Affairs Minister Dr.S Jaishankar-a chuan Australia nena inlaichinna a than zel theih nan ruahmanna te a taka tihhhlawhtlin zel a ni a ti



### **SHC CAMPAIGN ENDS**

Naktuk, Thawhlejni zing dar 7 leh tlai dar 4 inkara Sinlung Hills Council inthlan vote thlak tur atana inbuatsaihna peihfel thawkhat a ni.

State Election Commissioner Dr. H. Lalthlangliana chuan inthlang tura inbuatsaihna tluang taka a kal thu sawiin lawmthu a sawi a, Sinlung Hills Council inthlanna atana vote neite chu vote thlak vek turin a sawm a ni. Nimin tlai dar 4 atang khan Sinlung Hills Council inthlan atana camapign hun a tawp a. He mi hun chung hian political party, candidate leh anmahni puitu tumah engti kawng maha vote zawn khap a ni a ti. Zawhna chhangin state election commissioner chuan tun tum inthlan campaign chungin an hnenah election model code of conduct bawhchhia a inpuhna thlen an awm loh thu a sawi a. A lo awm a nih pawhin state election commission thleng lova distric election officer-te'n an ching fel thei zel a nih a rin thu a sawi a.

Campaign hun tawp hnu-ah chuan candidate leh election agent te leh party office bearer, state in-charge a ruat te tih loh bial pawn atanga campaign tura lo kal, bial chhunga a vote nei si lo te chuan bial an chhuahsan tawh tur a ni a. Hemi hun chung hian Electronic Media/ Social Media leh a tlukpui dangte ah inthlan kaihnawih, mipui rilru sukthlek tidanglam thei thilte tarlan/chhuah phal a ni tawh lo. Hemi chung hian mipui ngaihdan lakna 'Opinion Poll' siam leh 'exit poll' (Vote thlak zote kawmna/zirbingna atanga inthlan result rinlawkna) buatsaih loh tur a ni. Hei hian vote thlak tan hun atanga a zawh hnu darkar chanve thleng a huam ang. Representation of the People Act, 1951 sec. 130 in a sawi angin inthlan ni-ah hian polling station atanga metre 100 huamchung ah vote dilna anga ngaih thei thil reng reng tih phal a ni lo bawk a ni.

Sinlung Hills Council hi Aizawl, Saitual leh Kolasib district chungna awm a ni hlawm a. Aizawl district-ah bial 6, Saitual district-ah bial 4 leh Kolasib district-ah bial 2 te a awm a. Manipur leh Assam ramri hnaih a nih avangin venhimna khauh taka kalpui tul a ngaih a ni a. Kolasib district-ah hian bial 2 awmin polling station 7 a awm a, polling station zawng zawng chu venhimna uluk zual ngai (critical polling station) a puan a ni a.

Aizawl district a bial 6 a polling station 19 zinga 6 chu venhimna uluk zual ngai a puan a ni a, Saitual district a bial 4 a polling station 12 zinga 3 chu venhimna uluk ngai zuala puan a ni bawk.

Puan tawh angin Aizawl district bawrhsap Pu C. Lalhriatpuia chuan nimin tlai khan thupek chhuahin November ni 2 atanga Sinlung Hills Council inthlanna zawhfel a nih hma chuan ramri khar a nih thu a puang a. Hei hi inthlan tihbuai tum misualte an lo luh theih lohna atana tih a ni a. Aizawl district bikah chuan Zokhawthiang, Khawpuar, Vaitin leh New Vervek khua, Manipur atanga luhkate a huam a ni.

Hetih lai hian nimin kha Pathianni a nih avangin Inrinni chawhnu lam khan political party-te chuan inthlan campaign hi hmun hrang hrangah an khar tawh a ni.



#### BIRDS

Mizoram district hrang hrang bawrhsapte chuan tun hnai khan ramsa, sava leh nungcha dangte that leh tinat khapna thupek an tichhuak.

Bawrhsapte chuan October leh November thla hi sava pem chite'n Mizoram an rawn paltlanga an chawlh thin bakah sava awmsa te leh ramsate pel thinte an awm tih an tarlang a. Hetianga nungcha pel hmangte hi an lo intipalh fo tawh niin an sawi bawk a. Ram hla tak atanga sava pen thinte'n Mizoram an rawn paltlang a an chawlh lai a lo that emaw lo tina emaw lo turin thupek an siam a. Air gun/Air Rifle, silai, sairawkerh leh hmanraw dang hmanga ramsa leh sava reng reng vaha kah leh man khapna hi Bharatiya Nagarik Suraksha Sanhita, 2023 section 163 tlawhchhana thupek chhuah a ni a. Dan bawhchhetute chu Bharatiya Nyaya Sanhita, 2023 section 223 hmanga hrem theih an nih thu thupekah chuan an tarlang a ni.



#### DRUG-RELATED DEATHS

Kumin thla 10 (January leh October) inkar chhung khan ruihhlo hmansual vangin Mizoramah mi 61 an thi tawh a, an zinga 8 chu hmeichhia an ni.

Excise & Narcotics department chhinchhiah danin kumin October ni 14 hnu-ah ruihhlo vanga nunna chan an la awm leh rih lo. Kum 1984 atang khan Mizorama ruihhlo hmansual avanga thi chhinchhiah tan a ni a, kum 1984 khan heroin vangin mi pakhat a thi a ni. Kum 1984 atanga tun thleng hian ruihhlo vangin mi 1,871 an thi tawh a. An zinga 1,644 chu mipa ni-in 227 chu hmeichhia an ni. Mizo thalaite'n an thih chhan tam ber chu nachawkna damdawi spasmo proxyvon leh parvon spa hmanga inchiu kha a ni a. Heroin leh damdawi dang ruih kawp leh heroin hmangte'n an dawt leh a ni.



**ORDER CANCELLED**

Mizoram sorkar Finance department-in hmasawna hna thawk lo department-te'n hna an neih apianga PWD hnena pe tura thupek dinglai a thiahna chu Zirtawpni khan a sut leh.

Finance department secretary Pu Lalthansanga chuan October ni 22 khan hriattirna chhuahin hmasawna hna thawk ve lo (non-works department)-te hna thawh theih ve phal chin awm thin thiah a nih tak thu a chhuah a. Hriattirna a chhuahah chuan hmasawna hna thawk lo department-te'n hnathawh tur an neih ang chi eng pawh PWD kuta pe kher lovin an department-in an buaipui thei tawh ang tih tarlan a ni. Mizoram Public Procurement Rules, 2020 rule 92 tlawhchhanin an duh phawt chuan hna hi an department-in an thawk thei ang tih a ni a. Hetiang ti tur hian Finance department remtihna lak a ni ang tih a ni. He hriattirna hi engineer hovin an helh hle a. Zirtawpni a minister Pu K. Sapdanga hova Mizoram Engineering Service Association (MESA) inkhawmpui-ah pawh an duh loh thu hi an puang hial a ni.

Hemi ni vek hian Finance department secretary Pu Lalthansanga bawh chuan hriattirna dang tichhuakin October ni 22 a hriattirna chhuah chu hnuhdawh leh a nih thu a tarlang a ni.

<<>>

**ASF**

Nimin khan African Swine Fever (ASF) vawk pulhri avangin vawk 12 a thi a, vawk thite hi district 3 ami a ni.

Lunglei district-a khaw 3-ah vawk 7 thi-in Serchhip district a khaw 2-ah 5 a thi a, Hnahthial district-ah 1 a thi bawh. Heti hian kumin February ni 9-a Champhai district Leithum khua a ASF vawk pul hri vanga vawk thi hmuhchhuah hmasak ber atanga kumin chhunga he vawk pulhri leng avanga vawk thi tawh zat chu 14,371 a tling tawh a. Tun dinhmunah hian khaw 252 chu ASF vawk pulhri lenna khua a puan mek a ni. Niminah khan vawk damlo 10 chu Serchhip district a khaw pathumah talh a ni a. Hemi tiam hian kumin chhunga vawk damlo talh tawh zawng zawng chu 23,818 a tling tawh a ni.

<<>>

**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh [newsonair.gov.in](http://newsonair.gov.in) ah te chanchinthar hi ngaihthlak leh chhiar theih a dah a ni.

<<>>

**PM ON TB**

Prime Minister Narendra Modia chuan tuberculosis TB vei zat an tlahniam zel chu India-in ngaihtuahna thar nen tihtakzeta a do vang a ni a ti. Social Media-a a thu dahah PM Modia chuan mitin thawhhona tha avangin sawrkar chuan TB awmlona ramah India siam turin a bei zel dawn a ti bawh. World Health Organisationi (WHO) chhinchhiah danin kum 2015 atanga 2023 chhunga India-a TB vei zat tlakhniamna hi zaa 17.7 a ni a. Khawvel puma TB vei zat tlakhniamna zaa 8.3 aiin a sang zawk a.

Union Health Minister JP Nadda chuan he hlawhtlinna hian India in TB vei enkawl na leh natna darh zel tur thunun kawnga a thawhrim dan a tarlang a ti a. Sawrkar hmalakna sawiin National TB Elimination Programme chu tilian a ti chak zelin Ni-Kshay Poshan Yojana hmangin TB vei te tan chaw tha pek an ni a ti baw.



**EAM JAISHNKAR**

External Affairs Minister Dr.S Jaishankar-a chuan Australia nena inlaichinna a than zel theih nan ruahmanna te a taka tihhlawhtlin zel a ni a ti. Brisbane, Australia-a University of Queensland-a India mi chengte hmaah he thu hi sawiin Pu Jaishankar-a chuan ram pahnih inlaichinna chu a tha zawngin a inthlak chho zel tih sawiin theihtawp chhuah hruaitute hmalakna leh hmahlir tha tak avanga tun dinhmun hi thleng a ni a ti a.

India chu nasa takin a thang chho mek tih sawiin khawvel kal ruala than chhoh zel a duh a ni a ti baw.

Pu Jaishankar-a hian ram pahnih tlawh turin nimin khan a zin chhuak a. Australia-a a cham chung hian Brisbane-a Indian Consulate thar a hawng dawn a. Hei bakah hian Foreign Ministers' Framework Dialogue vawi 15-naa Australia Foreign Minister Penny Wong nen hun an hmang ang.

Pu Jaishankar-a hian a zin thawhnhinaah Singapore a tlawh leh dawn a. ASEAN Roundtable vawi 8-naah thu a sawi ang

